




KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 1, No. 6

website: www.geocities.com/navaldiocese

Enero 2005



Most Rev. Filomeno G. Bactol, D.D.

Mensahe

“Kasadya ‘ning taknaa, dapit sa kahimayaan...”

Ang milabay nga Pasko naghatag kanato ug paglaum sa kinabuhing mahimayaon sa dihang natawo sa atong kinabuhi ang Manunubos. Pinaagi niini, nakaambit kita sa kinabuhing Diosnon ug naisa kita ngadto sa dapit sa kahimayaan nga maoy hinungdan sa atong kasadya ug pagmaya.

“Bag-ong tuig, bag-ong kinabuhi...”

Sa atong malipayon nga pagdawat sa bag-ong tuig 2005, giatubang usab nato ang hagit sa pagbag-o sa atong kinabuhi. Sa makadaghan gipahinumduman kita nga ang kristohanong kinabuhi usa ka walay hunong nga proseso sa pagsantos sa atong kaugalingon. Ug ang gasa sa bag-ong tuig usa lamang sa mga pamaagi diin gipahinumduman kita sa Ginoo sa maong pagbag-o.

“Bulahan O bulahan, ang Simbahan nga giawitan...”

Ang pagbag-o sa kaugalingon kinahanglan magdala kanato ngadto sa pag-alagad sa katilingban, kay makita lamang nato ang kahulugan sa atong kinabuhi kung kini gihalad alang sa kaayohan sa isigka-ingon. Dinhi mosulod ang hagit sa pagbag-o sa atong katilingban pinaagi sa BEC. Hinaut pa unta nga ang bag-ong tuig maghatag kanato ug bag-ong kadasig diha sa pagpanginlabot nato sa kabag-ohan sa atong katilingban alang sa kabulahanan sa atong Simbahan.

Niining tanan, kami nga mga kaparian nagpasalamat kaninyong tanan sa kanunay ninyong paghatag ug bili sa mga panglantaw sa atong Simbahan ug paghatag ninyo kanunay sa inyong mahigugmaon nga pag-alagad. Kami manghinaut nga ang bag-ong tuig magdala kanato sa dugang pang kadasig sa pagbag-o sa Simbahan ug pagpalambo sa atong katilingban pinaagi sa BEC.

MABUNGAHON NGA BAG-ONG TUIG KANATONG TANAN!

Bishop FILOMENO G. BACTOL, D.D.
ug mga Kaparian sa Naval



Pamalandong sa
EBANGHELYO

Enero 2, 2005 - Domingo sa Epipaniya sa Ginoo
Basahon: Isaias 60:1-6/ Efeso 3:2-3, 5-6/ Mateo 2:1-12

Tema:

Ang panahon sa Pasko nagpadayon uban sa lain na usab nga panlantaw sa Dios diha sa atong kasaysayan. Diha sa iyang pagpakatawo, si Jesus mao ang nagpadayag sa Dios. Mao kini ang panahon anus-a gisaulog nato ang Batang Jesus, apan mas labaw pa niini ang pagpadayag, ang Epipaniya sa Dios ngadto sa tibuok kalibutan.

Ang ebanghelyo nagpadilaab sa daghang mga kasingkasing pinaagi sa sugilanon sa tulo ka mga dumuduong sa Bethlehem. Tinultolan sa dan-ag sa bituon, miadto sila aron paghalad sa ilang mga gasa: bulalwan, insenso ug mira. Tinabangan sa unang duha ka mga pagbasa, masabtan nato ang kahulugan niining hamubong yugto. Ang Dios misulod sa atong kasaysayan. Gasa kini alang sa tanan. Posible nga ang tulo ka hari nahibot sakay sa mga kamelyo gikan sa Midian ug Ephah ug nanagdala sila og bulawan ug insenso gikan sa Sheba; apan sila nagtimaan gayod nga ang tibuok kanasuran magalakaw diha niining kahayag. Sa karaang Simbahan, nagkahulugan kini nga ang mga Hentil, mga dili-Judio, isipon usab nga mga isigka-manununod uban sa mga Judio kay mga sakop sa mao ra nga lawas.

Ang atong pagkalingaw paghandum ug pagtuki sa misteryo niining adlaw mas labaw pa gayod kay sa paghunahuna mahitungod sa tulo ka hari. Mas mahinungdanon usab nga sutaon gayod kon unsaon paghubad ang Griyegong pulong: “MAGI”. Kini sila

“Basic Ecclesial Communities: A new way of being Church”

gitawag nga mga hari, mga maalamong tawo, o mga batid sa kabituonan sa langit. Sa bisan asang panghitabo, sila nagtmailhan sa adlaw anus-a saulogon ang pagpadayag sa Dios pinaagi ni Cristo Jesus. Sa higayon nga saulogon nato ang Epipaniya, atong giharong ang misteryo ni Cristo ug ang atong tubag diha sa pagtuho.

Pamalandongi kini:

1. Sa pagsulod sa Dios sa tawhanong kasaysayan siya usab misulod sa atong tagsatagsa ka kinabuhi. Diha sa imong pagkinabuhi, makit-an ba ang Dios? Unsa ang mga tmailhan niini?
2. Giunsa man nimo pagtagad ang mga dili nimo isigkamagtutuo? Giisip mo ba silang mga “anak sa gawas” sa ingon dili sila makapanunod sa kaluwasan nga gitanyag kanato sa Dios?
3. Unsay hagit alang kanimo niining ebanghelyo karon?

Enero 9, 2005 - Piyesta sa Pagbunyag sa Ginoo
Basahon: Isaias 42:1-4'6-7/ Buhat 10:34-38/Mateo 3:13-17

Tema:

Hapit na moabot ang tinuig nga panahon sa kahayag. Ang bulan sa Enero tingtugnaw pa sa mga nasud nga nahamutang sa amihanang suok sa kalibutan. Midaug ang kahayag batok sa kangitngit ug ato karong gisaulog ang masanag nga paglaum sa kaluwasan.

Sagad ang mga pamilya, mga tindahan ug mga katilingban nanghipos na sa ilang mga dayandayan sa Pasko ug tipigan kini sulod sa napulog-usa ka bulan. Alang sa Simbahan, ang panahon sa

pagkatawo ug pagpadayag dili mahipos ni matipigan. Ang piyesta sa Pagbunyag sa Ginoo wala magbugkos ni maglangkob sa misteryo. Nagpahinumdom kini kanato sa lain pa gayong bahin sa Pasko, apan nag-andam na usab sa misteryo ni Jesus pinaagi sa pagsaysay sa matag Ebanghelyo sinoptiko (nila ni San Marcos, San Mateo ug San Lucas).

Gisaysay sa mga ebanghelista ang pagbunyag kang Jesus nga maoy pagsugod sa iyang kinabuhing publiko tungod kay ang nagkalainlaing mga detalye sa ilang pagsaysay nagbutyag sa iyang pagka-siya. Sama sa sulugoon nga gidayeg sa basahon ni Propeta Isaias, mianhi si Jesus aron pagtuman sa kabubut-on sa Dios. Gibalaan siya diha sa Espiritu. Siya mao ang pinalanggang Anak.

Kining mga pagsangyaw mahitungod ni Jesus naghatod kanato ngadto sa mas hingpit nga kaamgohan sa misteryo sa pagpangluwas ni Cristo. Pinaagi sa bunyag kita nahimong lawas ni Cristo, nga kinahanglang moatubang sa samang misteryo sa pagkamatay ug pagkabanhaw. Kita usab kinahanglang bukas ngadto sa Espiritu, ug maalinggaton sa atong pagpakighilambigit ngadto sa Dios. Busa puy-an nato ang kinabuhi sa usa ka tinun-an ug sugdan nato pagsabot ang tinuod nga kahulugan sa kasaysayan.

Pamalandongi kini:

1. Isip binunyagan ikaw usab kinahanglang mosubay sa mga giagian ni Cristo – sa iyang pagkamatay ug pagkabanhaw. Andam ka ba nga mosubay sa iyang dalan?
2. Diha sa imong adlaw-adlawng pagkinabuhi, gituman mo ba ang kabubut-on sa Dios?



KATILINGBAN
Ang aksyon nga nagtatalan sa Basikong Eklezial Komunita (BEC) sa panahon sa Bawat

TEAM MINISTRY

Team Moderator: Bishop Filomeno G. Bactol, D.D.

Team Members: Fr. Marvyn A. Maceda
Fr. Benjamin C. Pantas
Fr. Jesus G. Ty
Fr. Kenneth Hendricks
Fr. Dario Bebillio
Fr. Bing Colasito

Salvador Castro

Ramises Bongabong

Eudoxia Canonoy

Catalina S. Machete

Reymund Icaín

Linda S. Roldan

Necitas B. Casado

Gualberto Tonelete

Encoders:

Rovina Z. Sabroso Sonia S. Pitao

Josephine C. Romero

Circulation Managers:

Jorge Manco

Daniilo Jayubo

Jonnell Quilaneta

Alfredo Olaer

Business Managers:

Rizalito V. Curso

Conchita Calvez

Computer Specialist

Oscar O. Borrinaga

Enero 16, 2005 – Piyesta ni Senyor Santo Niño
Basahon: Isias 9:1-6/ Efeso 1:3-6, 15-18/ Mateo 18:1-5, 10

Tema:

Ang Santo Niño magpabilin nga tipik sa atong kinabuhi. Ang paghatag nato'g bili niini nagpadayag lamang sa atong tim-os nga relasyon sa Batang Jesus.

Tinuod mahiligon kita'g mga bata. Nakadayeg kita sa ilang mga kinaiya ug mga hiyas. Tungod niini ang atong pagtagad sa Batang Jesus mitakdo sa naandang mga kinaiya sa mga bata. Gitan-aw nato ang kaayo, kalumo og kasingkasing, pagka-inosente ug pagkamatinud-anon sa Batang Jesus mao nga walay puas kitang nagdebosyon kaniya.

Ang larawan sa Santo Niño nagtug-an kanato'g usa ka kamatuoran. Kadaghanan kanato mipili sa Batang Jesus kay sa "hingkod" nga Jesus. Kini tungod kay kadaghanan nato dili man gusto nga manginlabet si Jesus sa atong kinabuhi isip usa ka magtutudlo sa moralidad. Gusto man gud nato ang Jesus nga atong mapangayoan, mamandoan, mapamaraygan kay siya usa man ka suod nga higala, usa ka manghod nga igsoon, usa ka magtatabang. Dili kita nianang Jesus nga magtulisok sa atong tanlag.

Kon ingon niini ang atong pagdebosyon kang Senyor Santo Niño, nan halayo ra kita sa tinuod nga kahulugan sa pagdebosyon. Mao kini ang matuod nga kahulugan sa pagdebosyon kaniya: nga kita mahatod ngadto sa pagsunod sa iyang mga hiyas.

Pamalandongi kini:

1. Unsa man ang mga pagpadayag sa imong pagdebosyon kang Senyor Santo Niño?
2. Unsa sa mga hiyas sa Batang Jesus ang imong gipaningkamotan sa pagpuyo diha sa imong kinabuhi?

Happy New Year!

From:

Parish Formation Team

Enero 23, 2005 – Ikatulong Domingo "Sulod sa Tuig"
Basahon: Isaias 8:23-9:3/ 1Cor.1:10-13,17/Mateo 4:12-17

Tema:

Ang pagawali ni Jesus maoy nag-ukab sa Ebanghelyo niining Domingoha. Natapos na ang panahon sa pagpanagna sa dihang gidakop si Juan nga Magbubunyang. Ang mga pultahan sa bilanggoan mitak-op na niining lanog nga tingog. Hangtod niining tungora si Jesus nagpakahilom. Mao nga sukad karon kinahanglan iyang isangyaw nga ang gingharian ania na .

Kining maong pagsangyaw nagsugod didto sa Galilea. Angay natong mahinumdoman nga maoy sagad nga panghunahuna sa mga Judio nga wala gayoy maayo nga magagikan sa Galilea (Juan 1:46). Si Propeta Isaias mimantala sa kahayag sa Mesiyas, ang Emmanuel, ngadto niining mga tawhana. Si Jesus moingon usab kanila nga siya mao ang nagdala sa malipayong balita, ug ang nagpahibalo sa Sion nga "Hari ang imong Dios" (Isaias 52:7). Kining pagbanagbanag sa gingharian nagtawag sa pagbag-o sa kasingkasing.

Sugod niining tungora diha sa mga tinun-an nga makanunayong misunod sa Mesiyas. Nagpabilin ang paghandum sa ilang kamakanunayon kang Jesus. Ug dinhi nahimugso ang Simbahan.

Pamalandongi kini:

1. Kining maong pagbangbang sa gingharian nagdala ba'g pagbag-o diha sa imong kasingkasing? Unsay mga timailhan niini?
2. Ikaw nagmakanunayon ka ba sa pagsunod sa Mesiyas? Sa unsang paagi?

Enero 30, 2005 - Ika-upat nga Domingo "Sulod sa Tuig"
Basahon : Sofonias 2:3; 3:12-13/ 1Cor.1:26-31/
Mateo 5:1-12

Tema:

Diha sa mga pagbasa karong adlawa ang gingharian sa Dios maoy nahimong kinadak-ang binali. Niining maong gingharian ang tanan nga angay untang tinguhaon mao hinoo'y gipakawalay-bili. Mibutyag si Propeta Sofonias nga dili ang mga

adunahan, ni ang mga gamhanan maoy gipili aron molahutay sa gikahadlokang kagubot sa “Adlaw sa Ginoo,” hinoon ang mga mapaubsanon ug mga kabus. Gisultian ni San Pablo ang makilalison nga mga taga-Corinto nga ang Dios padayong nagpili dili sa mga maalamon, ni sa mga adunahan, ni sa mga kusgan, hinoon sa mga huyang. Mismo si Jesus nagmatuod nga ang tinuod nga bulahan dili sila nga hamugaway, ni sila nga malampuson. Hinoon giisip ni Jesus nga tinuod nga bulahan sila nga daw sinalikway sa palad: ang mga kabus, ang mga nanagsubo, ang mga nanginahanglan, ang mga gilutos.

Mao ba diay kini ang gingharian sa Dios? Puloyanan sa mga biniyaan sa palad? Daw ingon gayod niini, sumala sa gilarawan sa ebanghelyo. Dapit kini diin ang mga kobrador sa buhis ug ang mga babayeng nagbaligya sa ilang dungog mao hinooy unang gidawat kay sa mga tawong relihiyoso. Usa usab kini ka kombira kansang mga dinapit gitigom gikan sa kadalanan. Mao ra kini ang piyesta diin ang Ginoo mismo makigpangaon uban sa mga makasasala. Hinoon dili man sa ingon nga ang mga buhong wala dawata.

Pinaagi sa iyang paghatag og mas espirituanong panlantaw sa mga gipakabulahan sa gingharian, si San Mateo labaw kay kang San Lucas, misugyot nga ang panghunahuna ug kinaiya maoy isyu dinhi. Sila nga gipakadato sa panlantaw niining kalibutana hayon malipay ug matagabaw sa ilang kaugalingon ug sa ingon dili na mangita ug manginahanglan pa, bisan gani sa Dios. Anaa na man nila ang tanan. Buhong na man sila sa tanan. Mao nga wala na silay gikinahanglan pa. Ug tungod kay wala man sila makaamgo sa ilang pagkagutom, ilang gibaliwala ang pagdapit sa Ginoo aron pag-apil sa pagpangaon sa matuod nga pan sa kinabuhi.

Bulahan sila nga nakaamgo nga sila nanginahanglan! Gawasnon silang mangita pag-una sa gingharian sa Dios. Ug sila nga mangita, makakaplag gayod!

Pamalandongi kini:

1. Nakaamgo ka ba sa imong pagkakabus atubangan sa Dios nga maoy tagpiya sa tanan?
2. Nagkinahanglan ka ba kaniya? Nan, pangitaa Siya ug sigurado ka nga makaplagan mo siya.

BEC Bulletin

Fellowship- Meeting

January 15, 2005(3rd Saturday)
Monthly BEC Presidents & Alagad
Fellowship-Meeting
Venue: Libtong Daku Chapel

-oOo-

January 16, 2005 (3rd Sunday)
Monthly BEC Presidents & Alagad
Fellowship-Meeting
Venue: Sitio Kawayanan Chapel

BEC ANNIVERSARY

January 24, 2005 - Caraycaray (Zone 1)
January 25, 2005 - Smo. Rosario (Zone 3)
January 25, 2005 - Villacaneja



Gitik-gitik sa Kinabuhi

TEXT JOKE

Insik: Ayon chinese holoskop, ikaw hawak celfon gamit ikaw kanan kamay para dating glasya, tapos ikaw lagi ngiti pala pasok swelte, tapos ikaw utot lakas pala labas malas!

-oOo-

Puro na lang ako... sa Math ako.. Sa Science Ako..Ako.. Ako.. Ang unang bagbati sa Iyo nang “Hapi New Year” ako pa rin!

-oOo-

(Human manimba sa pista sa tulo ka hari)

Butyok: Pre, Happy 2 Kings!

Pare : Unsay happy 2 kings? Happy 3 kings!

Butyok: Di ba, namatay na man si “Da King”

mao nga duha na lang sila!

-oOo-

Rooster Year 2005 na! Naway tilaukan ka ng grasya, kahigin ka ng suwerte, tukain ka ng ligaya at itlogan ka ng pera, kapatid!